



Broj: 01-50-1-15-74/05
Sarajevo, 14. februara 2006.

Z A P I S N I K

74. sjednice Predstavničkog doma
Parlamentarne skupštine Bosne i Hercegovine,
održane 14. februara 2006. godine

Sjednica je počela u 10,10 sati. Prisustvovalo je 40 poslanika.

Opravdano su odsustvovali: Azra Hadžiahmetović i Elmir Jahić.

Iz Vijeća ministara BiH sjednici su prisustvovali: predsjedavajući Adnan Terzić, ministri Bariša Čolak, Ljerka Marić, Mirsad Kebo i Branko Dokić, kao i zamjenik ministra Ivica Marinović.

Sjednici Doma prisustvovali su i predstavnici Ureda za reviziju finansijskog poslovanja institucija BiH i predstavnici Državne regulatorne komisije za električnu energiju.

Iz međunarodnih organizacija sjednicu su pratili: Maja Ribar, Jelena Despot i Sanja Stanojević – OHR, te Dario Šikuljak, Amila Ibrahimović i Amra Agović – OSCE, te Loredana Pasku – rumunska ambasada.

U uvodnim napomenama predsjedavajući Doma Nikola Špirić upoznao je poslanike o izmjenama i dopunama prijedloga dnevnog reda, koji je dostavljen u pozivu za sjednicu. Rekao je da je iz Prijedloga dnevnog reda skinut Prijedlog zakona o verifikaciji obaveza po osnovu računa stare devizne štednje, zato što je nadležna komisija zatražila produženje roka jer je otvorila javno saslušanje o Prijedlogu zakona. Iznio je i razloge za skidanje s dnevnog reda Prijedloga zakona o dopuni Zakona o javnim ispravama (predlaže: poslanik Dušanka Majkić) i Informacije o realizaciji zaključaka Predstavničkog doma.

Predsjedavajući je obrazložio i uvrštavanje novih tačaka u dnevni red, a to su:

- Zahtjev poslanika Mirsada Ćemana za razmatranje Prijedloga zakona o dopuni Zakona o akcizama u BiH po hitnom postupku, u skladu s članom 104. Poslovnika;

- Zahtjev poslanika Momčila Novakovića, Elmira Jahića i Vinka Zorića za razmatranje Prijedloga zakona o izmjenama i dopunama Izbornog zakona BiH po hitnom postupku, u skladu s članom 104. Poslovnika; i

- Zahtjev Vijeća ministara BiH za razmatranje Prijedloga zakona o izmjenama i dopunama Zakona o carinskoj politici BiH po hitnom postupku, u skladu s članom 104. Poslovnika.

- Imenovanje člana delegacije Parlamentarne skupštine u OSCE - umjesto Seade Palavrić i

- Imenovanje člana Vijeća Regulatorne agencije za komunikacije BiH.

Poslije uvodnih napomena o prijedlogu dnevnog reda, predsjedavajući je iznio prijedlog zaključka o kojem se jednoglasno usaglasio Prošireni kolegij Doma, a to je da:

Predstavnički dom Parlamentarne skupštine BiH najenergičnije osuđuje paljenje zastava zemalja prijateljskih Bosni i Hercegovini i pisanje grafita uvredljivih sadržaja, što je viđeno na ulicama Sarajeva, a pri tome ne spori slobodu građana da javnim protestima iskažu svoje neslaganje, u skladu s civilizacijskim normama i standardima.

O prijedlogu zaključka nije bilo rasprave. Usvojen je s 28 glasova za i jednim suzdržanim.

U raspravi o prijedlogu dnevnog reda učestvovali su: Jozo Križanović, Tihomir Gligorić, Zlatko Lagumdžija, Mladen Potočnik, Petar Kunić, Ljiljana Milićević, Sead Avdić, Adem Huskić, predsjedavajući Vijeća ministara BiH Adnan Terzić, Beriz Belkić, Momčilo Novaković i Vinko Zorić.

Mladen Potočnik pitao je zašto u dnevni red nije uvrštena informacija Vijeća ministara BiH vezano za Koridor 5c i izgradnju mosta kod Neuma. Rekao je da će predložiti da Parlamentarna skupština BiH od

Parlamenta Evropske unije zatraži mišljenje o ponašanju Republike Hrvatske prema Bosni i Hercegovini u vezi s pripremama za izgradnju mosta na Pelješcu.

Predsjedavajući Špirić odgovorio je da je Vijeće ministara BiH dostavilo informaciju i da je upućena nadležnoj komisiji, te da će, kad nadležna komisija dostavi svoje mišljenje, Informacija biti uvrštena u dnevni red.

Zlatko Lagumdžija i Tihomir Gligorić pitali su da li je s 1. tačke prijedloga dnevnog reda - Izvještaj o aktivnostima Obavještajno-sigurnosne agencije BiH za period od 1.6. do 31.12.2004. – skinuta oznaka povjerljivosti, te ako nije, oni ne žele učestvovati u raspravi o ovom izvještaju.

Zlatko Lagumdžija je također rekao da je prije nekoliko sjednica tražio da Vijeće ministara BiH dostavi informaciju o događajima u vezi s Regulatornom agencijom za komunikacije BiH i dodjelom dozvola za treću generaciju mobilne telefonije, pa je tada Dom zaključio da se o tome ne raspravlja na toj sjednici nego da Vijeće ministara BiH pripremi informaciju i da se ona uvrsti u dnevni red sljedeće sjednice. Zatražio je da se ponovo aktuelizira taj zaključak kako bi konačno dobili informaciju i o njoj raspravljali na sljedećoj sjednici.

Petar Kunić predložio je da se na dnevni red naredne sjednice stavi informacija o tragediji porodice Abazović i da se pozove SIPA da Domu dostavi tu informaciju.

Kunić je također problematizirao pitanje direktnog TV prijenosa sjednica Doma i zatražio da se konačno realizira zaključak Doma.

U ime Mješovitog kluba, **Sead Avdić** zatražio je da se Vijeće ministara BiH upozna (ako već nije) o događajima u vezi s Regulatornom agencijom za komunikacije BiH, naglasivši da u medijima ima mnogo kontroverznih informacija oko upada SIPA-e u ovu agenciju.

Ljiljana Milićević izrazila je nezadovoljstvo što je s dnevnog reda skinuta informacija o realizaciji zaključaka Doma i što Vijeća ministara BiH nije dostavio traženu informaciju. Predložila je da se od Vijeća ministara BiH zatraži da obavezno dostavi informaciju i da se o tome raspravlja na narednoj sjednici.

Adem Huskić također je problematizirao pitanje realizacije zaključaka Doma, pa je zatražio da se barem sačini pregled usvojenih zaključaka ako nije moguće sačiniti pregled realiziranih i nerealiziranih zaključaka. Huskić je podržao prijedlog Mladena Potočnika i također zatražio da Vijeće ministara BiH podnese informaciju o izgradnji mosta na Pelješcu.

Predsjedavajući Špirić rekao je da će Služba za narednu sjednicu pripremiti pregled zaključaka Doma, a da će se vidjeti kako je moguće ustanoviti koji su realizirani a koji nisu.

U vezi s TV prijenosom sjednica, predsjedavajući je rekao da je upućen zahtjev Javnom RTV servisu i da je stigao odgovor glavnog urednika koji traži sastanak s Kolegijem kako bi se našao način na koji se može realizirati zaključak Doma.

Duža rasprava vođena je u vezi s oznakom povjerljivosti na Izvještaju o aktivnostima OSA-e, nakon zahtjeva Lagumdžije i Gligorića da se javno raspravlja o ovom izvještaju. Međutim, nakon duže rasprave i usaglašavanja u pauzama, predsjedavajući Vijeća ministara BiH Adnan Terzić objasnio je da on nije na Izvještaj stavio oznaku povjerljivosti niti je to uradilo Vijeće ministara BiH, nego podnosilac Izvještaja, odnosno direktor Agencije, te da on po Zakonu on nije ovlašten da skida oznaku povjerljivosti.

Poslije rasprave, predsjedavajući je konstatirao da 74. sjednica ima sljedeći

D N E V N I R E D

1. Izvještaj o aktivnostima Obavještajno-sigurnosne agencije BiH za period od 1.6. do 31.12.2004. – pov. materijal;
2. Usvajanje Zapisnika 73. sjednice Predstavničkog doma PSBiH;
3. Poslanička pitanja i odgovori;
4. Zahtjev poslanika Mirsada Čemana za razmatranje Prijedloga zakona o dopuni Zakona o akcizama u BiH po hitnom postupku, u skladu s članom 104. Poslovnika;
5. Zahtjev poslanika Momčila Novakovića, Elmira Jahića i Vinka Zorića za razmatranje Prijedloga zakona o izmjenama i dopunama Izbornog zakona BiH po hitnom postupku, u skladu s članom 104. Poslovnika;
6. Zahtjev Vijeća ministara BiH za razmatranje Prijedloga zakona o izmjenama i dopunama Zakona o carinskoj politici po hitnom postupku, u skladu s članom 104. Poslovnika;
7. Prijedlog budžeta institucija BiH i međunarodnih obaveza BiH za 2006. (prvo čitanje);

8. Prijedlog zakona o izvršenju Budžeta institucija BiH i međunarodnih obaveza BiH za 2006. (prvo čitanje);
9. Prijedlog zakona o Agenciji za informaciono društvo BiH (prvo čitanje);
10. Prijedlog zakona o izmjeni Zakona o slobodi pristupa informacijama u BiH (prvo čitanje) – predlagač: poslanik Nikola Špirić;
11. Prijedlog zakona o dopunama Zakona o javnim nabavkama (prvo čitanje) predlagač: poslanik Muhamed Moranjkić;
12. Prijedlog zakona o izmjenama i dopunama Zakona o porezu na dodatu vrijednost (predlagač: poslanik Zlatko Lagumdžija), s izvještajem Komisije za finansije i budžet;
13. Prijedlog zakona o izmjenama i dopunama Zakona o porezu na dodatu vrijednost (predlagač: poslanik Jozo Križanović), s Izvještajem Komisije za finansije i budžet;
14. Prijedlog zakona o izmjenama i dopunama Zakona o Obavještajno-sigurnosnoj agenciji BiH, s Izvještajem Zajedničke komisije za nadzor nad radom Obavještajno-sigurnosne agencije BiH;
15. Izvještaj Zajedničke komisije oba doma o nastojanju za postizanje sporazuma o identičnom tekstu Zakona o izmjenama i dopunama Zakona o Ombudsmenu za ljudska prava BiH;
16. Izvještaj Zajedničke komisije oba doma o nastojanju za postizanje sporazuma o identičnom tekstu Zakona o zaštiti potrošača BiH;
17. Izvještaj Zajedničke komisije oba doma o nastojanju za postizanje sporazuma o identičnom tekstu Zakona o implementaciji Konvencije o zabrani razvoja, proizvodnje, gomilanja i upotrebe hemijskog oružja i njegovom uništavanju;
18. Izvještaj Ureda za reviziju finansijskog poslovanja institucija BiH o izvršenoj reviziji u 2004.:
 - a) Ministarstva sigurnosti BiH,
 - b) Ministarstva vanjske trgovine i ekonomskih odnosa BiH,
 - c) Ministarstva vanjskih poslova BiH,
 - d) Ministarstva za ljudska prava i izbjeglice BiH,
 - e) Pravobranilaštva BiH,
 - f) Predsjedništva BiH,
 - g) Regulatorne agencije za komunikacije BiH,
 - h) Službe za zajedničke poslove institucija BiH,
 - i) Suda BiH,
 - j) Tužilaštva BiH.
19. Izvještaj o radu Državne regulatorne komisije za električnu energiju u 2005.;
20. Davanje saglasnosti za ratifikaciju:
 - a) Sporazuma o razvojnoj saradnji između Vijeća ministara BiH i Vlade Republike Slovenije,
 - b) Ugovora između Vijeća ministara BiH i Vlade Republike Hrvatske o plovidbi plovnim putevima unutrašnjih voda i njihovom obilježavanju i održavanju.
21. Imenovanje člana delegacije Parlamentarne skupštine u OSCE-u umjesto Seade Palavrić;
22. Imenovanje člana Vijeća Regulatorne agencije za komunikacije BiH.

Pošto je konstatirao dnevni red sjednice, predsjedavajući Špirić rekao je da je Mladen Potočnik tražio da se glasa o njegovom prijedlogu zaključka – **da se zahtijeva od Vijeća ministara BiH da od Evropske komisije zatraži stav o tome koliko Republika Hrvatska doprinosi saradnji u regiji time što otkazuje potpisani ugovor o granicama koji je Bosna i Hercegovini ratificirala i o namjeri gradnje mosta preko zaliva koji Bosni i Hercegovini omogućava slobodan pristup otvorenom moru.**

Intervenirao je Martin Raguž, rekavši da je Potočnik tražio da to pitanje bude tačka dnevnog reda, pa se o ovom glasalo kao o prijedlogu za dopunu dnevnog reda.

Za je glasalo 14, protiv sedam, suzdržalo se devet poslanika. Iz Federacije BiH za je glasalo 12, iz Republike Srpske dva poslanika.

Predsjedavajući je konstatirao da prijedlog nije dobio entitetsku većinu i da će se provesti postupak usaglašavanja.

Predsjedavajući je također konstatirao da je Dom (nije se posebno glasalo) prihvatio prijedlog Zlatka Lagumdžije **da se urgira za izvršenje zaključka vezano za Regulatornu agenciju za komunikacije BiH,**

kao i prijedlog Petra Kunića, **da se od SIPA-e zatraži informacija o tragediji porodice Abazović**, i da se ove informacije uvrste na narednu sjednicu Doma.

Muhamed Altić intervenirao je u vezi s prijedlogom koji je iznio Sead Avdić - **da Vijeće ministara BiH podnese informaciju u vezi s upadom SIPA-e u Regulatornu agenciju za komunikacije BiH**, rekavši da se oni ne slažu s odgovorom predsjedavajućeg – da SIPA radi svoj posao. Naglasio je da je Dom i ranije odlučivao o raznim komisijama koje su osnivane da preispitaju šta rade određeni organi, te da se Dom treba izjasniti i o prijedlogu koji je, u ime Kluba, iznio Sead Avdić.

Predsjedavajući Špirić odgovorio je, uz ostalo, da je prihvaćen prijedlog Zlatka Lagumdžije da se urgira za izvršenje zaključka Doma, da Vijeće ministara BiH podnese pisani izvještaj o nesporazumima vezanim za Regulatornu agenciju za komunikacije BiH, koji će se ticati i pitanja koja je iznio Avdić, te da će Vijeću ministara BiH biti upućena urgencija.

Sead Avdić nije se saglasio s objašnjenjem predsjedavajućeg – da je i njegov prijedlog obuhvaćen prijedlogom Lagumdžije.

Predsjedavajući je naglasio da je konstatirao usvojeni dnevni red 75. sjednice, pa je prešao na 1. tačku.

Ad – 1: Izvještaj o aktivnostima Obavještajno-sigurnosne agencije BiH za period od 1.6. do 31.12.2004. – pov. materijal

Zlatko Lagumdžija je, odmah nakon otvaranja ove tačke, pitao da li je usvajanjem dnevnog reda prihvaćeno i da je ova tačka povjerljiva. Od predsjedavajućeg je dobio potvrđan odgovor. Zatim je Lagumdžija zatražio kratku pauzu (jedan minut) kako bi poslanici SDP-a napustili sjednicu.

Predsjedavajući je ponovo rekao da Dom nije ovlašten da skida oznaku povjerljivosti s materijala koje dobije od drugih institucija i zamolio da se rad sjednice nastavi u skladu s Poslovnikom Doma.

U vezi s povjerljivošću predmetnog izvještaja i poslovničkom odredbom koja propisuje ponašanje Doma u slučaju povjerljivosti materijala, diskutirali su: Milorad Živković, Ljiljana Milićević, Tihomir Gligorić, Šefik Džaferović, Sead Avdić, Beriz Belkić, predsjedavajući Vijeća ministara BiH Adnan Terzić, Momčilo Novaković, Mirsad Sipović i Hazim Felić.

U raspravi su izražena oprečna mišljenja i zatraženo da se poslanicima predoči Zakon kako bi se razjasnilo pitanje povjerljivosti materijala, pa je predsjedavajući dao pauzu i pozvao predstavnike klubova poslanika i predsjedavajućeg Vijeća ministara BiH na konsultacije.

Poslije pauze predsjedavajući Špirić obavijestio je poslanike da se u pauzi pokušalo doći do prijedloga koji je u skladu sa Zakonom i Poslovnikom Doma. Naglasio je da Dom nema pravo da skida oznaku povjerljivosti i da se prema povjerljivom materijalu mora odnositi u skladu sa Zakonom i Poslovnikom.

Predsjedavajući Vijeća ministara BiH pročitao je odredbu člana 87. Zakona o Obavještajno-sigurnosnoj agenciji – prema kojoj se povjerljivost materijala može skinuti samo uz odobrenje generanog direktora Agencije. Naglasio je da član 11. stav (1) istog zakona izričito kaže da predsjedavajući Vijeća ministara BiH ne može preuzeti odgovornosti i prava generalnog direktora Agencije, ni djelimično, ni u cjelini.

Nakon objašnjenja zakonskih odredbi, diskutirali su Zlatko Lagumdžija i Tihomir Gligorić.

Zatim su poslanici SDP-a i Tihomir Gligorić napustili sjednicu i odsustvovali tokom rasprave o Izvještaju iz ove tačke.

U uvodnim napomenama o Izvještaju o aktivnostima Obavještajno-sigurnosne agencije BiH, za period od 1.6. do 31.12.2004., predsjedavajući Nikola Špirić podsjetio je na Izvještaj Zajedničke komisije i zaključke koje Komisija predlaže domovima na usvajanje.

U vezi s Izvještajem, u raspravi su učestvovali: Beriz Belkić, Milorad Živković, Hazim Felić, Mirsad Sipović, Petar Kunić i Ibrahim Đedović.

Poslije rasprave, predsjedavajući Doma Nikola Špirić napomenuo je da je predmetni izvještaj prvi nakon osnivanja Agencije i izrazio očekivanje da će izvještaj za 2005. uskoro biti dostavljen i da neće imati slabosti o kojima su govorili učesnici u raspravi. Predložio je da Dom prihvati ovaj izvještaj sa zaključcima predloženim u Izvještaju Zajedničke komisije.

Sa 17 glasova za (Federacija BiH 12, Republika Srpska 5), usvojen je Izvještaj o aktivnostima Obavještajno-sigurnosne agencije BiH za period od 1.6. do 31.12.2004., sa zaključcima koje je predložila nadležna komisija, a koji glase:

1. Primila k znanju Izvještaj o aktivnostima Obavještajno-sigurnosne Agencije BiH za period od 1. 6. – 31. 12. 2004.

2. S ciljem eliminiranja iznošenja u sredstvima javnog informiranja neistinitih podataka a koji se odnose na moguće veze grupa, organizacija i pojedinaca, koji su nosioci međunarodnog terorizma, sugerira se Vijeću ministara BiH kao izvršnom organu i drugim nadležnim institucijama BiH da preduzmu aktivnosti radi presijecanja prakse objavljivanja podataka koji imaju karakter tajnosti i koji nisu zasnovani na istinitim činjenicama.

3. Izvještaj o aktivnostima Obavještajno-sigurnosne agencije, kao i drugi dokumenti koji se u skladu sa Zakonom dostavljaju na razmatranje Parlamentarnoj skupštini BiH, treba da prate dinamiku priprema i donošenja budžeta institucija BiH.

Ad – 2: Usvajanje Zapisnika 73. sjednice Predstavničkog doma PSBiH

Na Zapisnik nije bilo primjedbi pa je usvojen jednoglasno.

Ad – 3: Poslanička pitanja i odgovori

Odgovore na pitanja komentirali su: Miloš Jovanović, Ivo Lozančić i Selim Bešliagić.
Postavljena su nova pitanja kako slijedi:

Miloš Jovanović:

«Ko je i na osnovu kojih propisa tražio od EUFOR-a da uhapsi Dragomira Abazovića, kada je u akciji hapšenja smrtno stradala njegova supruga, a on i jedanaestogodišnji sin teško ranjeni?»

Petar Kunić:

«Postavio bih pitanje vezano za zakon o budžetskim korisnicima. Moja inicijativu prije možda i devet-deset mjeseci bila je da se donese zakon o plaćama budžetskih korisnika. U kojoj je to fazi? Zašto se oklijeva s tim kada znamo da je to urgentna stvar? Urgentna je zato što neke institucije same sebi određuju plaće».

Ljiljana Milićević

«Zašto se na poslanička pitanja ne odgovara na pismu i jeziku na kojem su i postavljena? Odgovori bi morali poštovati pravo na jezik i pismo svakog poslanika!»

Marija Perkanović

«Kada će biti ispoštovan zaključak Predstavničkog doma od 12.4.2005., broj 01-50-1-54-54/2005 /napominjem da su takve zaključke donijeli i Dom naroda PSBiH 27.4.2005., te Predsjedništvo BiH dva puta, i to 22.3.2005. i 7.9.2005./ kojim se zahtijevalo od Vijeća ministara BiH, Ministarstva za finansije i trezor BiH, a po osnovu Zakona o Ombudsmenu za ljudska prava BiH – «Službeni glasnik BiH», br. 19/02. i Zakona o izmjenama i dopunama Zakona o Ombudsmenu za ljudska prava BiH – "Službeni glasnik BiH", br. 35/04., vezano za plaće ombudsmena i koji se primjenjuje od 1.1.2004.»

Ruža Sopta

1. «Tražim od Vijeća ministara BiH da uradi izvještaj o energetske situaciji u BiH s aspekta svih energenata koji se koriste u domaćinstvima, institucijama i privredi odvojeno – s aspekta reguliranja cijena kroz regulatorne agencije i fiskalnu politiku.

2. Predlažem Vijeću ministara BiH da izide s inicijativom objedinjavanja regulatornih agencija za električnu energiju radi objedinjavanja tržišta električne energije.

3. Predlažem Vijeću ministara BiH da, u okviru izmjena Zakona o akcizama, za koji cijenim da je u pripremi, nađe rješenja za ukidanje akciza na lož-ulje koje se koristi za grijanje.

Naime, kroz postojeću energetske politiku u BiH provodi se velika diskriminacija pojedinih regija i prema stanovništvu – domaćinstvima tih regija i prema privredi pojedinih regija, te tražimo da se ta diskriminacija eliminiše.

Dužanka Majkić

«Kada će biti uvedeni količinski kontigenti slobodnog uvoza, te ukinute carine i prelevmani za rasplodni i tovni materijal, i to:

- | | |
|---------------------------|--------------------------|
| - junad za tov | - tar. br. 0102 90 49 00 |
| - junice neteljene | - tar. br. 0102 10 10 00 |
| - mesnate pasmine prasadi | - tar. br. 0103 91 90 00 |

Jelina Đurković

«Kakva je stručna, kvalifikaciona struktura zaposlenih u Regulatornoj agenciji za komunikacije BiH – u svim sektorima i u upravljačkoj strukturi? Da li se zapošljavanje vrši prema zahtjevima struke? Molim odgovor od Vijeća ministara BiH u zakonskom roku.»

Selim Bešlić

«Zadovoljan sam brzim odgovorom i osnivanjem komisije za izradu zakona o dobrobiti životinja. Moje pitanje glasi:

Da li je u Odluci ispravno naveden «član V» - da se komisiji odredi novčana naknada, jer svi članovi su državni službenici čija je obaveza priprema zakona, za šta i primaju lični dohodak? Da li je ovo presedan koji bi se mogao negativno reflektirati na dalje pripreme zakona, a samim tim i finansijska pitanja? Molim pisani odgovor od ministra – Ministarstva trgovine i ekonomskih odnosa BiH».

Ivo Lozančić

«Najavljeno poskupljenje električne energije za 30.12.2005. prolongirano je za prva četiri mjeseca 2006. Očekuje se za mjesec dana povećanje cijena električne energije koje će biti udar na potrošače (sve kategorije potrošača). Obaveza je Vijeća ministara BiH da, u saradnji s entitetskim vladama, ima spremne zaštitne mjere za sprečavanje poremećaja procesa proizvodnje kod velikih potrošača električne energije i mjere zaštite socijalno ugroženih kategorija u domaćinstvima. Iz Izvještaja DERK-a za 2005. vidno je da u ovom trenutku ne mogu u potpunosti imati harmonizaciju cijena u elektroprivredama koje egzistiraju u BiH.»

Sead Avdić i Muhamed Altić

1. «Konstatirajući da je intervencija SIPA-e u Regulatornoj agenciji za komunikacije BiH legalna i legitimna, da je u njenoj nadležnosti da provodi istrage, pa i na izvještaj revizora o poslovanju RAK-e, tražimo da Vijeće ministara BiH razmotri eventualne političke motive koje iznose predstavnici RAK-e, njihovu utemeljenost i ciljeve, jer se, podržavajući djelatnost SIPA-e, mora reagirati ne eventualni pokušaj politizacije, odnosno intervencije ovog državnog organa motiviranog političkim ciljevima, kao što se to u javnosti ističe.»

2. «Tražimo od Vijeća ministara BiH da sagleda stanje granica u BiH, aktuelizira probleme koji sprečavaju potpisivanje i ratifikaciju sporazuma o granicama BiH i Republike Hrvatske, i BiH i Srbije i Crne Gore. Vijeće ministara BiH treba predložiti mjere zajedno s Predsjedništvom BiH, koje bi vodile hitnom uspostavljanju sporazuma o granicama i njihovoj ratifikaciji, tim više što je većina otvorenih pitanja na ekspertskom nivou usaglašena.»

Senija Kapetanović

«Ministarstvu za ljudska prava, imigraciju, izbjeglice i azil upućujem pitanje – da li radi na međuentitetskom ujednačavanju prava civilnih žrtava rata, kao veoma osjetljive kategorije, jer su u sadašnjim zakonskim rješenjima neka pitanja neadekvatno tretirana i predstavljaju kršenje ljudskih prava».

Ako se ovim pitanjima nije bavilo, iako ona proizilaze iz same funkcije ovog ministarstva, **pokrećem inicijativu** da se pokrenu pitanja izmjena u entitetskim zakonima iz ove oblasti ili da se predloži zakon na nivou države kako bi se ovo pravednije riješilo. Razlozi za ovu inicijativu su mnogostruki».¹

Mehmed Suljkanović

«Uime Kluba poslanika Stranke za BiH, pokrećem inicijativu da se rasprava o izmjenama Ustava BiH premjesti u institucije BiH, odnosno u Parlamentarnu skupštinu BiH. Postojeći ustav, kao temeljni akt države, koji nisu donijeli građani ove zemlje, nego je nametnut Dejtonskim sporazumom o završetku rata, postao je nepremostiva prepreka daljnjem razvoju Bosne i Hercegovine i njenom putu ka evroatlantskim integracijama.

Predlažem Kolegiju da objedini ovu i sve dosadašnje inicijative o promjeni Ustava BiH i hitno ih prosljedi Ustavno-pravnoj komisiji, koja će, u skladu s Poslovníkom, uputiti ove inicijative u parlamentarnu proceduru.»

Mirsad Sipović:

Ponovo je postavio pitanje kao na prošloj sjednici:

«U kojoj je fazi i kada će biti upućen u parlamentarnu proceduru Zakon o advokaturi BiH?»

¹ Obrazloženja poslaničkih pitanja dostavljena su uz pitanja na adrese institucija kojima su postavljena.

Ad – 4: Zahtjev poslanika Mirsada Ćemana za razmatranje Prijedloga zakona o dopuni Zakona o akcizama u BiH po hitnom postupku, u skladu s članom 104. Poslovnika

O zahtjevu nije bilo rasprave.

S 26 glasova za, četiri protiv i dva suzdržana, usvojen je zahtjev Mirsada Ćemana za razmatranje Prijedloga zakona o dopuni Zakona o akcizama u BiH po hitnom postupku, u skladu s članom 104. Poslovnika.

Ad – 5: Zahtjev poslanika Momčila Novakovića, Elmira Jahića i Vinka Zorića za razmatranje Prijedloga zakona o izmjenama i dopunama Izbornog zakona BiH po hitnom postupku, u skladu s članom 104. Poslovnika

U okviru ove tačke u raspravi su učestvovali: Vinko Zorić, Mirsad Ćeman, Petar Kunić, Momčilo Novaković, Tihomir Gligorić, Milorad Živković i Sead Avdić.

Poslije rasprave, s 29 glasova za (Federacija BiH 19, RS 10) i devet protiv, usvojen je zahtjev predlagača za proceduru po članu 104. za Prijedlog zakona o izmjenama i dopunama Izbornog zakona BiH.

Ad – 6: Zahtjev Vijeća ministara BiH za razmatranje Prijedloga zakona o izmjenama i dopunama Zakona o carinskoj politici po hitnom postupku, u skladu s članom 104. Poslovnika

Bez rasprave, s 30 glasova za i jednim protiv, usvojen je zahtjev Vijeća ministara BiH za razmatranje Prijedloga zakona o izmjenama i dopunama Zakona o carinskoj politici po hitnom postupku, u skladu s članom 104. Poslovnika.

Ad – 7: Prijedlog budžeta institucija BiH i međunarodnih obaveza BiH za 2006. (prvo čitanje)

U uvodnim napomenama predsjedavajući je podsjetio poslanike na Izvještaj nadležne komisije i amandmane koji su podneseni u plenarnoj fazi.

U raspravi u prvom čitanju učestvovali su: Jozo Križanović, Beriz Belkić, ministrica Ljerka Marić, Sead Avdić, Ljiljana Milićević, Momčilo Novaković i Zlatko Lagumdžija.

S 23 glasa za, 11 protiv i dva suzdržana, usvojen je Prijedlog budžeta u prvom čitanju.

Dom je usvojio prijedlog predsjedavajućeg da se pređe i u drugo čitanje Prijedloga budžeta.

Predsjedavajući je podsjetio prisutne da su amandmane u plenarnoj fazi podnijeli: Klub SDS-a – osam, Klub SNSD – jedan, Zlatko Lagumdžija – 11, Miloš Jovanović – pet, Jozo Križanović – jedan i Tihomir Gligorić – jedan amandman.

U raspravi u drugom čitanju učestvovali su: Zlatko Lagumdžija, Momčilo Novaković, Tihomir Gligorić, Jozo Križanović, Milorad Živković, Beriz Belkić i Nikola Špirić.

Poslije rasprave predsjedavajući je na glasanje dao amandmane, redosljedom kojim su podnošeni.

Nije usvojen nijedan amandman Kluba SDS-a.

Klub SDA odustao je od amandmana.

Amandman Kluba SNSD-a usvojen je u tekstu koji je usaglašen u pauzi, uz učešće ministrice finansija i trezora BiH Ljerke Marić.

Nisu usvojeni ni amandmani Zlatka Lagumdžije, Miloša Jovanovića, Jozе Križanovića i Tihomira Gligorića.

Poslije izjašnjavanja o svim amandmanima, Dom se izjasnio o Prijedlogu budžeta u drugom čitanju.

Za Budžet je glasalo 26 (Federacija BiH 21, RS 5), 10 poslanika glasalo je protiv.

Predsjedavajući je konstatirao da je usvojen Budžet institucija BiH i međunarodnih obaveza BiH za 2006.

Ad – 8: Prijedlog zakona o izvršenju Budžeta institucija BiH i međunarodnih obaveza BiH za 2006. (prvo čitanje)

Poslije uvodnih napomena predsjedavajućeg, Muhamed Moranjkić diskutirao je o Prijedlogu zakona u prvom čitanju.

Prijedlog zakona u prvom čitanju usvojen je s 27 glasova za i šest protiv.

Predsjedavajući je na glasanje dao prijedlog da se pređe u drugo čitanje. Prijedlog je usvojen.

Predsjedavajući je podsjetio da su u plenarnoj fazi amandmane podnijeli Muhamed Moranjkić – dva i Dušanka Majkić – jedan.

U raspravi u drugom čitanju učestvovali su: Dušanka Majkić, Momčilo Novaković i Ljiljana Milićević.

Predsjedavajući je, poslije rasprave, dao na glasanje amandmane.

Za amandman 1. Muhameda Moranjkića glasalo je 16 (iz RS-a 8, iz Federacije BiH 8), protiv 14, suzdržalo se pet poslanika.

Kako nije bilo entitetske većine, Kolegij je odmah proveo usaglašavanje.

Predsjedavajući je obavijestio da nije postignuta saglasnost o amandmanu, pa je proveo drugi krug glasanja, kada je iz Federacije BiH protiv amandmana glasalo 13 poslanika, što je manje od 2/3 iz entiteta.

Predsjedavajući je konstatirao da je usvojen amandman 1. Muhameda Moranjkića.

Drugi amandman Moranjkića nije usvojen.

Momčilo Novaković i Ljiljana Milićević prigovorili su da amandman Dušanke Majkić nije podnesen pravovremeno, tj. da je na telefaks Parlamentarne skupštine primljen 12. februara u 10,45 sati, što je manje od 48 sati prije početka sjednice.

Predsjedavajući Doma Nikola Špirić obavijestio je poslanike da je Kolegij amandman prihvatio kao pravovremen, ali je zbog prigovora sugerirao Dušanki Majkić da amandman povuče, što je i učinjeno.

Zatim je predsjedavajući na glasanje dao Prijedlog zakona u drugom čitanju.

Za je glasalo 29 (Federacija 21, RS 8), protiv šest poslanika.

Predsjedavajući je konstatirao da je usvojen Zakon o izvršenju budžeta institucija BiH i međunarodnih obaveza BiH za 2006.

Ad – 9: Prijedlog zakona o Agenciji za informaciono društvo BiH (prvo čitanje)

U uvodnim napomenama o Prijedlogu ovog zakona predsjedavajući je upoznao Dom da je na Proširenom kolegiju vođena rasprava o Prijedlogu zakona, kada je izneseno više primjedbi na njegov sadržaj, pa je postignut konsenzus da se Komisiji da novi rok da sa Vijećem ministara BiH dodatno razmotri Prijedlog zakona i pokuša doći do prihvatljivog teksta, te da Domu podnese novi izvještaj.

S 34 glasa za, jednim protiv i jednim suzdržanim, usvojen je **zaključak da se Komisiji da novi rok za razmatranje Prijedloga zakona, zajedno s Vijećem ministara BiH, te da Domu podnese novi izvještaj.**

Ad – 10: Prijedlog zakona o izmjeni Zakon o slobodi pristupa informacijama u BiH (prvo čitanje) – predlagač: poslanik Nikola Špirić

U uvodnim napomenama predsjedavajući je podsjetio na Izvještaj nadležne komisije, koja je jednoglasno usvojila tekst predloženog zakona.

Nije bilo rasprave.

Prijedlog zakona usvojen je jednoglasno i u prvom i u drugom čitanju.

Ad – 11. Prijedlog zakona o dopunama Zakona o javnim nabavkama (prvo čitanje) predlagač: poslanik Muhamed Moranjkić

U uvodnim napomenama predsjedavajući Doma podsjetio je da na 71. sjednici Dom nije usvojio Izvještaj nadležne komisije, kojim nije bio prihvaćen Prijedlog zakona, pa je Komisija, poslije ponovnog razmatranja, dostavila novi izvještaj, iz kojeg se vidi da na Prijedlog zakona nije bilo amandmana i da je prihvaćen u Komisiji u predloženom tekstu.

Nije bilo rasprave.

Dom je jednoglasno prihvatio Prijedlog zakona u prvom čitanju.

Također je jednoglasno usvojen i prijedlog da se pređe u drugo čitanje.

Nije bilo rasprave ni u drugom čitanju.

I u drugom čitanju jednoglasno je usvojen Zakon o dopunama Zakona o javnim nabavkama.

Ad – 12: Prijedlog zakona o izmjenama i dopunama Zakona o porezu na dodatu vrijednost (predlagač: poslanik Zlatko Lagumdžija), s izvještajem Komisije za finansije i budžet

Predsjedavajući je u uvodnim napomenama podsjetio da je Izvještaj Komisije za finansije i budžet negativan, tj. da Komisija nije prihvatila tekst predloženog zakona. Upozorio je da Dom raspravlja i odlučuje o Izvještaju Komisije.

U ime Komisije za finansije i budžet, govorila je predsjedavajuća te komisije Ljiljana Milićević.

U svojstvu predlagača Zakona, Zlatko Lagumdžija podnio je Domu obrazloženje.

U raspravi su učestvovali: Momčilo Novaković, Tihomir Gligorić i Zlatko Lagumdžija. Zatim je provedeno glasanje o Izvještaju Komisije.

Za Izvještaj je glasalo 16, protiv 15, suzdržao se jedan poslanik. Po entitetima, iz Republike Srpske za su glasala četiri, iz Federacije BiH 12 poslanika.

Predsjedavajući je konstatirao da Izvještaj nije dobio entitetsku većinu, te da slijedi postupak usaglašavanja, u skladu s Poslovnikom.

Ad - 13. Prijedlog zakona o izmjenama i dopunama Zakona o porezu na dodatu vrijednost (predlagač: poslanik Jozo Križanović), s Izvještajem Komisije za finansije i budžet

Predsjedavajući je podsjetio da nadležna komisija ni ovaj prijedlog zakona nije prihvatila i da Dom odlučuje o Izvještaju Komisije.

Kratko je, u svojstvu predlagača Zakona, govorio Jozo Križanović, a u ime Komisije za finansije i budžet, Ljiljana Milićević. Zatim je provedeno glasanje o Izvještaju Komisije.

Za je glasalo 16, protiv 13, suzdržao se jedan poslanik. Iz Federacije BiH za je glasalo 12, iz Republike Srpske četiri poslanika.

Predsjedavajući je konstatirao da Izvještaj nije dobio entitetsku većinu i da će se provesti postupak usaglašavanja u Kolegiju kao komisiji.

Ad - 14. Prijedlog zakona o izmjenama i dopunama Zakona o Obavještajno-sigurnosnoj agenciji BiH, s Izvještajem Zajedničke komisije za nadzor nad radom Obavještajno-sigurnosne agencije BiH

Predsjedavajući Nikola Špirić napomenuo je da Zajednička komisija nije prihvatila principe predloženog zakona i da Dom odlučuje o Izvještaju Zajedničke komisije koji je negativan.

U raspravi o ovoj tački učestvovali su: Mirsad Ćeman, Momčilo Novaković, Miloš Jovanović, Zlatko Lagumdžija, Nikola Špirić, Tihomir Gligorić, Petar Kunić, Beriz Belkić, Šefik Džaferović i Mirsad Sipović.

Poslije rasprave Dom je jednoglasno (s 32 glasa za) usvojio Izvještaj Zajedničke komisije za nadzor nad radom Obavještajno-sigurnosne agencije BiH.

Predsjedavajući je konstatirao da je pao Prijedlog zakona o izmjenama i dopunama Zakona o Obavještajno-sigurnosnoj agenciji BiH i sugerirao predlagaču Zakona da vodi računa o tonovima u raspravi povodom ovog zakonskog prijedloga.

Ad - 15. Izveštaj Zajedničke komisije oba doma o nastojanju za postizanje sporazuma o identičnom tekstu Zakona o izmjenama i dopunama Zakona o Ombudsmenu za ljudska prava BiH

Predsjedavajući Nikola Špirić u uvodnim napomenama podsjetio je da nije u Zajedničkoj komisiji oba doma usaglašen identičan tekst Zakona i podsjetio poslanike na odredbu stava 2. člana 100. Poslovnika Predstavničkog doma, u kojoj je propisano da se prijedlog zakona smatra odbijenim ako zajednička komisija ne postigne sporazum, ili ako oba doma ne usvoje njen prijedlog.

Povodom Izvještaja Zajedničke komisije, u raspravi su učestvovali: Martin Raguž, Beriz Belkić, Marija Perkanović i Sead Avdić.

Predsjedavajući Špirić konstatirao je da se u ovakvom slučaju Dom samo obavještava, u skladu s Poslovnikom, a da je na svima nama da tražimo mogućnost kako da dođemo do zakona koji će poštovati evropske standarde i principe, naglasio je Špirić.

Ad – 16. Izvještaj Zajedničke komisije oba doma o nastojanju za postizanje sporazuma o identičnom tekstu Zakona o zaštiti potrošača BiH

Predsjedavajući Špirić podsjetio je poslanike da je Zajednička komisija oba doma usaglasila tekst predmetnog zakona usvajanjem dva amandmana, pa je Izvještaj stavio na glasanje.

Izvještaj Zajedničke komisije usvojen je jednoglasno. Predsjedavajući je konstatirao da je konačno u ovom domu usvojen Prijedlog zakona o zaštiti potrošača BiH.

Ad – 17: Izvještaj Zajedničke komisije oba doma o nastojanju za postizanje sporazuma o identičnom tekstu Zakona o implementaciji Konvencije o zabrani razvoja, proizvodnje, gomilanja i upotrebe hemijskog oružja i njegovom uništavanju

U uvodu, predsjedavajući Doma rekao je da je Zajednička komisija usaglasila identičan tekst zakona iz ove tačke s tri amandmana.

Nje bilo rasprave. Dom je jednoglasno usvojio Izvještaj Zajedničke komisije, pa je i ovaj prijedlog zakona konačno usvojen.

Ad – 18: Izvještaj Ureda za reviziju finansijskog poslovanja institucija BiH o izvršenoj reviziji u 2004. godini:

- a) Ministarstva sigurnosti BiH,
- b) Ministarstva vanjske trgovine i ekonomskih odnosa BiH,
- c) Ministarstva vanjskih poslova BiH,
- d) Ministarstva za ljudska prava i izbjeglice BiH,
- e) Pravobranilaštva BiH,
- f) Predsjedništva BiH,
- g) Regulatorne agencije za komunikacije BiH,
- h) Službe za zajedničke poslove institucija BiH,
- i) Suda BiH,
- j) Tužilaštva BiH.

Predsjedavajući je u uvodnim napomenama podsjetio na izvještaje nadležne komisije o izvještajima o reviziji, u kojima su sadržani određeni zaključci i preporuke nadležne komisije.

U raspravi o ovoj tački učestvovali su: Zlatko Lagumdžija, Momčilo Novaković, Ljiljana Milićević, Dušanka Majkić, Nikola Špirić, Tihomir Gligorić, Ruža Sopta, Selim Bešlić, Sead Avdić, Muhamed Moranjkić, Senija Kapetanović i Mirsad Sipović.

Poslije rasprave predsjedavajući je na glasanje dao izvještaje o reviziji institucija iz ove tačke, kao i izvještaje nadležne komisije sa zaključcima i preporukama sadržanim u izvještajima.

Izvještaji Ureda za reviziju, kao i izvještaji nadležne komisije, sa zaključcima i preporukama, usvojeni su jednoglasno.

Ad - 19. Izvještaj o radu Državne regulatorne komisije za električnu energiju u 2005.;

U uvodnim napomenama predsjedavajući Doma podsjetio je na Izvještaj nadležne Komisije za saobraćaj i komunikacije i zaključke koje predlaže Komisija.

U raspravi povodom Izvještaja o radu DERK-a učestvovali su: Ruža Sopta, Martin Raguž, Selim Bešlić, Miloš Jovanović, Muhamed Moranjkić, Mirsad Ćeman, Izet Hadžić, Adem Huskić.

Povodom primjedbi iznesenih u raspravi u ime DERK-a govorio je Mirsad Salkić.

Poslije rasprave predsjedavajući Doma Nikola Špirić rekao je da treba da ostane tijesna saradnja Komisije Doma s DERK-om i predložio da Dom usvoji Izvještaj Državne regulatorne komisije, s Izvještajem nadležne komisije Doma sa zaključcima, uz sugestiju da se podnosiocu Izvještaja dostavi tekst rasprave vođene na ovoj sjednici radi uzimanja u obzir iznesenih stavova i primjedbi. Zatim je Izvještaj dao na glasanje.

S 27 glasova za (jednoglasno) usvojen je Izvještaj o radu Državne regulatorne komisije za električnu energiju u 2005., s Izvještajem Komisije Doma za saobraćaj i komunikacije i zaključcima koji glase:

1. Uzimajući u obzir činjenicu da je uvođenjem PDV-a i novog načina tarifiranja došlo do povećanja cijena električne energije, Dom predlaže Vijeću ministara BiH, Vladi Federacije BiH i Vladi RS-a, da sačine program zaštite socijalno ugroženih kategorija stanovništva, s ciljem ublažavanja posljedica uvođenja PDV-a za ovu kategoriju potrošača.

2. Sugerira se nadležnim institucijama da preduzmu sve potrebne mjere kako ne bi došlo do značajnijeg povećanja cijena električne energije.

Ad - 20. Davanje saglasnosti za ratifikaciju:

- a) Sporazuma o razvojnoj saradnji između Vijeća ministara BiH i Vlade Republike Slovenije,
- b) Ugovora između Vijeća ministara BiH i Vlade Republike Hrvatske o plovidbi plovnim putevima unutrašnjih voda i njihovom obilježavanju i održavanju.

Nije bilo rasprave. Dom je jednoglasno dao saglasnost za ratifikaciju Sporazuma i Ugovora iz ove tačke dnevnog reda.

Ad - 21. Imenovanje člana delegacije Parlamentarne skupštine BiH u OSCE-u – umjesto Seade Palavrić

Dom je, s 27 glasova za i jednim suzdržanim (Beriz Belkić), u delegaciju Parlamentarne skupštine BiH u OSCE-u izabrao Beriza Belkića, umjesto Seade Palavrić kojoj je prestao mandat poslanika u Predstavničkom domu.

Ad - 22. Imenovanje člana Vijeća Regulatorne agencije za komunikacije BiH

Miloš Jovanović primijetio je da u sali nema predstavnika Vijeća ministara BiH, jer bi on htio dobiti odgovor na pitanje da li je Branko Todorović bio na rang-listi iza Rajka Popovića, na osnovu čega bi se opredijelio prilikom glasanja.

Predsjedavajući Špirić rekao je da misli da Vijeće ministara BiH ne bi predložilo nekoga mimo zakonske procedure. Napomenuo je da je već dva mjeseca upražnjeno mjesto člana Vijeća RAK-a i da ima sugestija da se što prije izvrši ovo imenovanje.

Nije bilo više rasprave, pa je predsjedavajući proveo glasanje.

S 26 glasova za (Federacija BiH 18, Republika Srpska 8) i dva suzdržana, za člana Regulatorne agencije za komunikacije BiH imenovan je Branko Todorović, umjesto Rajka Popovića koji je podnio ostavku.

Ovim je, u 19,30 sati, završena 74. sjednica Predstavničkog doma.

Sastavni dio Zapisnika je transkript 74. sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Nikola Špirić